

Broj: 05-1903-6-1/20
Sarajevo, 17.06. 2020. godine

Na osnovu člana 23. stav (1) tačka d) Zakona o Agenciji za bankarstvo FBiH ("Službene novine Federacije BiH", broj 75/17), člana 16. stav (1) tačka j) Statuta Agencije za bankarstvo FBiH ("Službene novine Federacije BiH", broj 3/18), člana 100. stav (3) Zakona o javnim nabavkama ("Službeni glasnik BiH", broj 39/14), po preporuci Komisije za javne nabavke iz Zapisnika o ponovnom pregledu i ocjeni ponuda u postupku javne nabavke usluga internet provajdera, u dijelu postupka koji se odnosi na lot 1, broj: 05-1903-5-1/20, od 16.06.2020. godine, direktor Agencije za bankarstvo Federacije BiH donio je

ODLUKU

o usvajanju žalbe i stavljanju van snage Odluke o poništenju postupka javne nabavke usluga

- 1) Žalba ponuđača „Telemach“ d.o.o. Sarajevo, od 12.06.2020. godine, izjavljena u postupku javne nabavke usluga internet provajdera, u dijelu postupka koji se odnosi na lot 1, protiv Odluke o poništenju postupka javne nabavke usluga, broj: 05-1903-6/20 od 01.06.2020. godine, usvaja se kao osnovana žalba.
- 2) Ovom odlukom stavlja se van snage Odluka o poništenju postupka javne nabavke usluga, broj: 05-1903-6/20 od 01.06.2020. godine.

OBRAZLOŽENJE

Odlukom o pokretanju postupka javne nabavke usluga, broj: 05-1903/20 od 13.05. 2020. godine, odobreno je provođenje postupka javne nabavke usluga internet provajdera za potrebe Agencije za bankarstvo Federacije BiH (u nastavku: ugovorni organ). Javna nabavka provedena je putem konkurentskog zahtjeva za dostavu ponuda, a kriterij za dodjelu ugovora je najniža cijena tehnički zadovoljavajuće ponude. U skladu s članom 35. Zakona o javnim nabavkama Obavještenje o nabavci, broj: 3010-7-2-137-3-34/20, objavljeno je na portalu javnih nabavki (ejn.gov.ba), 15.05.2020. godine. Nabavka je podijeljena na dva lota, ukupne procijenjene vrijednosti od 8.000,00 KM, bez poreza na dodanu vrijednost (PDV), odnosno 4.000,00 KM po svakom lotu.

Komisija nadležna za provođenje predmetnog postupka utvrdila je da su ponude po ovom postupku nabavke dostavili slijedeći ponuđači: „Team Consulting“ d.o.o. Sarajevo, „Logosoft“ d.o.o. Sarajevo, „Mtel“ a.d. Banja Luka i „Telemach“ d.o.o. Sarajevo.

Na osnovu izvršene analize i ocjene prispjelih ponuda u pogledu utvrđivanja njihove prihvatljivosti u odnosu na kvalifikacijske uslove utvrđene u tenderskoj dokumentaciji, komisija je utvrdila određene nepravilnosti u ponudama svih ponuđača, zbog čega su iste ocijenjene neprihvatljivim, koje kao takve ne mogu biti predmetom daljnjeg razmatranja niti vrednovanja, te dala preporuku direktoru ugovornog organa da donese odluku o poništenju predmetnog postupka, saglasno članu 69. stav (2) tačka d) Zakona o javnim nabavkama.

Pridržavajući se uputa o pravnom lijeku, saglasno članovima 97. i 101. Zakona o javnim nabavkama, ponuđač „Telemach“ d.o.o. Sarajevo (u nastavku: žalilac), u propisanom roku, izjavio je žalbu na Odluku o izboru najpovoljnijeg ponuđača, broj: 05-1903-6/20 od 01.06.2020. godine, koju je Agencija zaprimila 15.06.2020. godine.

Po prijemu predmetne žalbe, u skladu s članovima 97. i 100. Zakona o javnim nabavkama, utvrđeno je da je žalba blagovremena, dozvoljena i izjavljena od ovlaštenog lica, čime su ispunjene procesne pretpostavke za razmatranje iste.

Žalilac u žalbi navodi da ispunjava sve zadane uslove za kvalifikaciju ponuđača, ističući da posjeduje ASN, te da su podaci o tome javno dostupni na linku: <https://bgpview.io/asn/42560>, navodeći da tenderskom dokumentacijom, naročito u njenom 3. poglavlju – Uslovi za kvalifikaciju ponuđača, tačka 1.4 (Tehnička i profesionalna sposobnost), nije traženo da ponuđači dostave posebnu izjavu o posjedovanju ASN-a – Autonomous System Number.

Dalje navodi da je uredno dostavio potpisan i ovjeren obrazac izjave o prihvatanju općih i posebnih uslova tenderske dokumentacije, koji je sastavni dio tenderske dokumentacije, čime je potvrdio da ispunjava navedeni uslov.

Razmatrajući po žalbi ovog ponuđača u pogledu ispunjavanja zadanih tehničkih uslova iz tenderske dokumentacije, komisija je u ponovljenom postupku ocjenjivanja ponude utvrdila da su navodi žalioaca u cijelosti osnovani te da isti ispunjava zadane uslove za kvalifikaciju ponuđača, s obzirom na to da u tenderskoj dokumentaciji, niti u jednom njenom dijelu, pa tako ni u Poglavlju 3. – Uslovi za kvalifikaciju ponuđača, tačka 1.4. (Tehnička i profesionalna sposobnost), nije postavljen uslov da su ponuđači dužni dostaviti posebnu pisanu izjavu da posjeduju ASN-a – Autonomous System Number. Temeljem naprijed navedenog, cijeneći utvrđeno činjenično stanje komisija je utvrdila da su žalbeni navodi žalioaca osnovani i da je njegova ponuda prihvatljiva te dala preporuku da se postojeća Odluka o poništenju postupka javne nabavke usluga, broj:05-1903-6/20 od 01.06.2020. godine, shodno članu 100. stav (3) Zakona o javnim nabavkama, stavi van snage i donese nova odluka o izboru najpovoljnijeg ponuđača kojom će se ugovor po predmetnom postupku nabavke dodijeliti podnosiocu žalbe.

Na osnovu svega izloženog, odlučeno je kao u dispozitivu.


DIREKTOR
Jasmin Mahmužić



Dostaviti:

- učesnicima u postupku
- a.a.

